

Antoko FANOROLAHY : santa-bokatra tany Mahambo



"Raha tiana ny hampandroso an'i Madagasikara dia ny fanampiana sy fampivoarana ny farim-piaianan'ny tantsaha Malagasy no antoka iray hahantanteraka izany". Izay raha fintinina ny fanambarana nataon'ny Filoha nasionalin'ny antoko Fanorolahy Andriamatoa Randrianary José, raha tafaresaka tamin'ny mpanao gazety ny tenany.

Ho an'ity antoko politika iray ity, efa ela no vita ny fanorenana ifotony nataony satria nandritra ny fotoana maro niorenan'ny antoko izay (1996), dia resy lahatra ny mpikambana ao aminy fa ny fanehoana ny tena fitiavan-tanindrazana marina dia amin'ny alàlan'ny asa avy hatrany fa tsy kabary.

Asa maro no efa notanterahin'ny antoko tamin'ny faritra maro manerana ny Nosy, ka anisan'izany, ohatra, ny tany Analanjirofo, Atsinanana, Atsimo-Atsinanana, Analamanga... nidina ifotony njery ireo maharary sy nihaino ny hetahetan'ireo tantsaha Malagasy ireo, ka nitondrana vahaolana avy hatrany. Anisan'izany, ohatra, ny fanofànana sy fanampiana ara-teknika ny tantsaha manerana ny Nosy, mba ahafahan'izy ireo mampitombo sy manatsara ny vokatra vokariny, mba hahatonga azy ireo hanana ambimbava hanatsaràna ny fari-piaianany. Eo ihany koa ny fanampiana ireo mpanjono amin'ny alalan'ny fanofanana sy fanolorana fitaovana ho azy ireo toy ny arato sy lakana tany amin'ny (Canal des Pangalanes) mba hoetiny miavo-tena amin'ny fiafina.

Ankoatra izay, tanjona ho an’ity antoko iray ity, ny hampivondrona ny tantsaha manerana ny Nosy ho ao anatina koperativan’ny Tantsaha Fanorolahy, mba hanamora ny fiaraha-miasa amin’ireo orinasa izay misehatra mivantana amin’ny fambolena sy fiompiana eto Madagasikara, ka anisan’izany ohatra ny Guanomad, izay nandefa teknisianina njery ifotony ny toe-tanin’izy ireo niampy fanolorana zezika maimaim-poana.

Etsy ankilan’izay, nangataka tolo-tànana tamin’ny kaonsilin’i Portugal Atoa Rabesahala Frédéric, miasa sy monina eto Madagasikara ny antoko, mba hanampiana mivantana ny tantsaha, nahazo masomboly voafantina toy ny voatabia, ovy, katsaka, vary... ireo tantsaha mpamokatra an’aliny maro manerana an’i Madagasikara.

Nomarihin’ity antoko ity, taorian’ny fampiharan’ny tantsaha ireo toro-marika izay nomena azy tany anaty fiofanana dia nahomby avokoa ny andrana izay natao, ka nanatanteraka santa-bokatra avokoa izy ireo ny 18 Jolay 2018 lasa teo, ka samy resy lahatra fa rehefa ny tantsaha no mivoatra (manankarena), dia mandroso ny firenena ary tafavoaka ao anaty fahantrana ny vahoaka Malagasy 25 tapitriza.

Fantatra ihany koa fa misy ny tetik’asa goavana tanterahin’ny antoko eny Ambohidratrimo eny ankehitriny. Ireo olona osa sy tena sahirana ara-pivelomana no tohanana amin’izany tetik’asa izany. Nangatahin’ny antoko tamin’ny tompon’ny tany ireo tany mipetrapotsiny rehefa vita ny fotoam-pambolena, mba hanaovana voly avotra ataon’ireo fianakaviana sahirana, ka ny tombotsoa ho azon’ny tompon-tany amin’izany dia ny fiakaran’ny vokatra hatrany amin’ny avo

dimy heny aorian’ny voly avotra satria maha lonaka ny tany ny fifandimbiasan’ny voly eo amboniny. Ny fianakaviana sahirana kosa dia hanana sakafy sy fidiram-bola vaovao.

Fehiny, ny fanomezana lanja ny tontolo ambanivohitra no antoka hisian’ny fampandrosoana eto amintsika.



Randrianary José,

Filohan’ny Antoko Fanorolahy